



鉅野縣志

卷二

DS
793
S42C683
1846
v.2



鉅野縣志卷之

特調鉅野縣知縣星沙黃少棠氏手訂

秦紀志

臣惟帝典王謨欽終欽始文光武烈不顯丕承實
乎尙矣我

國家

列聖相承四方其訓凡

綸綍所頒布豈邑乘所得書第念鉅邑雖最爾區而

轡輅曾經近光有素

鳳城伊邇被澤尤先凡草野安奠之身家皆

朝廷教養之德意爰綜

大訓敬冠簡編庶幾戶誦家絃俾與邑之士若民共凜
訂謨於罔斁云作恭紀志

謨訓 恭紀上

人臣儆心錄序

順治十二年

朕惟人臣立身制行本諸一心心正則爲忠爲直
衆美集焉不正則爲姦爲慝羣惡歸焉是故心者
萬事之本美惡之所出也顧事有殊塗心惟一
致一於國則忘其家一於君則忘其身如此者不
特名顯身榮邦國亦允賴之矣若夫姦邪之流猶

黨營私怙權亂政卒致身名俱喪爲國厲階蓋緣
居恒無正心之功一當勢利遂昏迷瞽亂狂肆驕
矜上昧王章下垂臣誼或作威而聯羽翼或比匪
而效奔趨如譚泰石漢以累世舊臣久叨恩遇不
思圖報逞臆橫行跋扈自恣目無綱紀陳名夏則
一介豎儒驟蒙顯拔倚任深重賜賚優隆而乃背
德植交蔑法罔上此皆自作罪孽以致隕厥身家
朕歷稽往古宵人誤國代代有之觀諸近事復炯
鑒昭然足爲永戒恐後之爲臣者或仍蹈覆轍負
主恩而渝素志至於身罹刑憲悔悼無由故推原

情狀而論列之錄成一編以爲人臣儆心之訓云
學校論康熙

治天下者莫亟於正人心厚風俗其道在尙教化
以先之學校者教化所從出將以納民於軌物者
也是以古者家有塾黨有庠術有序國有學人生
八歲自王以下至於庶人之子弟皆入小學及其
十有五年則自元子衆子以至公卿大夫元士之
適子與凡民之俊秀皆入大學蓋自家至於國莫
不有學自天子至於庶人莫不學自幼至於長莫
不有學凡學有詩書禮樂以爲之本干戈羽籥以

爲之文父子君臣長幼之道於是焉觀之六德六行之教於是焉取之所以淑其耳目手足之舉措而養其心以復其性以爲修己治人之大者可謂備至矣是以當時之君子履信思順以事其上小人亦皆樂循禮而耻犯法侯撻不事而至治以興後世學校寢廣博士之途寢繁所以立教之方失先王之遺意士之遊其中者直以爲利祿之階欲期道德之一詎不難哉且夫今之所謂教者誦讀焉而已爾而又弗實致其力以防其放僻邪侈之心使氣之充而識之明以漸求復其性其何以爲

修己治人之道哉故曰教隆於上化成於下教不
明於上而欲化成於下猶却行而求前也教化者
爲治之本學校者教化之原欲敦隆教化而興起
學校者其道安在在務其本而不求其末尙其實
而不務其華以內行爲先不汲汲於聲譽以經術
爲要不屑屑於文辭如是則於聖人化民成俗之
道庶乎其有當也夫

農桑論

康熙

嘗觀王政之本在乎農桑虞舜之命棄曰汝后稷
播時百穀禹之告舜也曰政在養民水火金木土

自朝至於日中昃不遑暇食又曰不寶尺璧而寶寸陰實惟勤之一言通貴賤上下而一之者也故因而論列之

守令箴

康熙

五等封建古今異宜郡縣之制百王同規壤地磐牙提封茶峙大者一州小者百里有社有稷有民有人守令何職職茲捐循勸農課桑宣條設教偃風以德從星惟好毋營筐篋毋急簿書惓惓之治歲計有餘莫高匪天而卑其聽莫愚匪民而智其性民不可掩天不可欺一之不慎而戚自貽稽古

治效嘉禾瑞麥勉能其官紹休前迹

康熙九年十月奉

上諭朕惟至治之世不專以法令爲務而以教化爲先其
時人心醇良風俗樸厚刑措不用比屋可封長治
久安茂登上理蓋法令禁於一時而教化維於可
久若徒恃法令而教化不先是舍本而務末也近
見風俗日敝人心不古囂凌成習僭濫多端狙詐
之術日工訟獄之興靡已或豪富凌轢孤寒或劣
紳武斷鄉曲或惡衿出入衙署或蠹棍詐害良善
椎苻之劫掠時聞讐忿之殺傷疊見陷罹法網刑

所必加誅之則無知可憫宥之則憲典難寬念茲
刑辟之日繁良由化導之未善朕今欲法古帝王
尙德緩刑化民成俗舉凡敦孝悌以重人倫篤宗
族以昭雍睦和鄉黨以息爭訟重農桑以足衣食
尙節儉以惜財用隆學校以端士習黜異端以崇
正學講法律以儆愚頑明禮讓以厚風俗務本業
以定民志訓子孫以禁非爲息誣告以全良善誠
窩逃以免株連完錢糧以省催科聯保甲以弭盜
賊解讐忿以重身命等項作何訓迪勸導及作何
責成內外文武該管各官督率舉行爾部詳察典

制定議具奏特諭

康熙十八年六月

上諭食爲民天必蓋藏素裕而後水旱無虞自古耕九餘
三重農貴粟所以藏富於民經久不匱洵國家之
要務也此以連年豐稔粒米充盈小民不知蓄積
恣其狼戾故去年山東河南偶逢歲歉卽以饑饉
流移見告雖議蠲議賑加意撫綏而被災之民生
計難遂良由地方有司各官平日不以民食爲重
未行申明勸諭之故近據四方奏明雨澤霑足可
望有年恐豐熟之後百姓仍前不加撙節妄行耗

費著各該地方大吏督率有司曉諭小民務令力
田節用多積米糧庶俾俯仰有資凶荒可備以副
朕愛養斯民至意爾部卽遵諭行特諭

康熙四十二年三月

詔曰朕爲天下生民主宵旰勤勞勵精圖治凡國家之休
戚閭閻之樂利晷刻之間無不注意於此天下之
大兆民之衆朕誰欺欺天乎至今四十餘載親歷
饑饉者不知其幾南北用兵者不知其幾人心向
背者不知其幾天變地震者不知其幾自責涼德
不能撫育履冰臨淵兢業惟守仰賴

上天眷佑

祖宗厚德幸生創業未久之際方免墜失今海寓昇平年
歲稍和生民俱已樂業邇來諸王大小臣工士庶
因朕五旬輿情肫切屢請加上尊號朕堅意固辭
不允所請蓋朕不以名譽稱揚爲尙惟以海內富
庶爲心是以屢蠲賦役頻省刑罰總欲使老安少
懷風俗淳厚漸幾於康乂隆平之治近因淮黃告
成乃東南要務再授方畧望有善後朕不辭勞瘁
親往閱視見畿輔山左江浙等省耆老人民俱中
心愛戴雖童穉亦咸歡欣瞻仰是知民心皆一用

是益深軫念視切如傷所以星夜回鑾茲特大沛
宏恩普施遐邇庶幾民生咸登壽域和協徧滿寰
區所有應行事例開列於後於戲安民則惠益弘
逮下之恩御衆以寬聿溥好生之德布告天下咸
使聞知

御製訓飭士子文

康熙四十年

國家建立學校原以興行教化作育人才典至渥
也朕臨馭以來隆重師儒加意庠序近復慎簡學
使釐剔弊端務期風教修明賢材蔚起庶幾樸
作人之意乃比來士習未端儒效罕著雖因內外

臣工奉行未能盡善亦由爾諸生積錮已久猝難
改易之故也茲特親製訓言再加警飭爾諸生其
敬聽之從來學者先立品行次及文學學術事功
源委有序爾諸生勿聞庭訓長列宮牆朝夕誦讀
寧無講究必也躬修實踐砥礪廉隅敦孝順以事
親秉忠貞以立志窮經考義勿雜荒誕之談取友
親師悉化慙盈之氣文章歸於醇雅毋事浮華軌
度式於規繩最防蕩軼子衿佻自昔所譏苟行
止有虧雖讀書何益若夫宅心勿淑行已多愆或
蜚語流言脅制官長或隱糧包訟出入公門或唆

撥姦猾欺孤凌弱或招呼朋類結社要盟乃如之
人名教不容鄉黨勿齒縱倖逃禡扑濫竊章縫返
之於衷能無愧乎況乎鄉會科名乃掄才大典關
係尤鉅士子果有真才實學何患困不逢年乃標
榜虛名暗通聲氣夤緣詭遇罔顧身家又或改竄
鄉貫希圖進取器凌騰沸網利營私種種弊情深
可痛恨且夫士子出身之始尤貴以正若茲厥初
拜獻便已作姦犯科則異時敗檢踰閑何所不至
又安望其秉公持正爲國家宣猷樹績膺後先疏
附之選哉朕用嘉惠爾等故不禁反復惓惓茲訓

言頒到爾等務其體朕心恪遵明訓一切痛加改
省爭自濯磨積行勤學以圖上進國家三年登造
束帛弓旌不特爾身有榮卽爾祖父亦增光寵矣
逢時得志寧俟他求哉若仍視爲具文玩愒弗儆
毀方躍冶暴棄自甘則是爾等冥頑無知終不能
率教也旣負栽培復干咎戾王章具在朕亦不能
爲爾等寬矣自茲以往內而國學外而直省鄉校
凡學臣師長皆有司鐸之責者並宜傳集諸生多
方董勸以副朕懷否則職業弗修咎亦難逭勿謂
朕言之不預也爾多士等敬聽之哉

鉅野縣知縣臣廖開春立石

雍正二年二月

上諭朕惟撫養元元之道足用爲先朕自臨御以來無刻
不厯念民依重農務本業已三令五申矣但我國
家休養生息數十年來戶口日繁而土地止有此
數非率天下農民竭力耕耘兼收倍獲欲家室盈
寧必不可得周官所載巡稼之官不一而足又有
保介田畯已在田間皆爲課農設也今課農雖無
專官然自督撫以下孰不兼此任也其各督率有
司悉心相勸並不時諮訪疾苦有絲毫妨於農業

者必爲除去仍於每鄉中擇一二老農之勤勞作
苦者優其獎賞以示鼓勵如此則農民知勸而惰
者可化爲勤矣再舍傍田畔以及荒山不可耕種
之處度量土宜種植樹木桑柘可以飼蠶棗栗可
以佐食柏桐可以資用卽榛桔雜木亦足以供炊
爨其令有司督率指畫課令種植仍嚴禁非時之
斧斤牛羊之踐踏奸徒之盜竊亦爲民利不小至
孳養牲畜如北方之羊南方之彘牧養如法乳字
以時於生計不無裨益總之小民至愚經營衣食
非不迫切而於目前自然之利反多忽畧所賴觀

民之官委曲周詳多方勸導庶使踴躍爭先人力
無遺而地利使盡不惟民生可厚風俗亦可還淳
爾督撫等官各體朕惓惓愛民之意實心奉行倘
視爲具文苟且塗飾或反以擾民則尤其不可也

雍正二年二月

上諭朕惟四民以士爲首農次之工商其下也漢有力田
孝弟之科而市井子孫不得仕宦重農抑末之意
庶爲近古今士子讀書祇行學成用世國家榮之
以爵祿而農民勤勞作苦手胼足胝以供賦稅養
父母育妻子其敦龐淳樸之行豈惟工賈不逮亦

非不肖士人之所能及雖寵榮非其所慕而獎賞
要當有加其令州縣有司擇老農之勤勞儉樸身
無過舉者歲舉一人給以八品頂帶榮身以示鼓
勵

雍正二年頒行

聖諭廣訓序

書曰每歲孟春道人以木鐸徇於路記曰司徒修
六禮以節民性明七教以興民德此皆以敦本崇
實之道爲牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六

十年來宵衣旰食祇期薄海內外興仁講讓革薄
從忠其成親遜之風永享昇平之治故

特頒上諭十六條曉諭八旗及直省兵民人等自綱常名
教之際以至於畊桑作息之間本末精粗公私鉅
細凡民情之所習皆

睿慮之所周視爾編氓誠爲赤子

聖有謨訓明徵定保萬世守之莫能易也朕纘承大統臨
御兆人以

聖祖之心爲心以

聖祖之政爲政夙夜黽勉承由舊章惟恐小民遵信奉行

久而或怠用申誥誠以示提撕謹將

上諭十六條尋繹其義推衍其文共得萬言名曰

聖諭廣訓旁徵遠引往復周詳意取顯明語多直樸無非

奉

先志以啟後人使羣黎百姓家喻而戶曉也願爾兵民等

仰體

聖祖正德厚生之志意勿視爲條教號令之虛文共勉爲

謹身節用之庶人盡除夫浮薄囂凌之陋習則風

俗醇厚家室和平在朝廷德化樂觀其成爾後嗣

子孫並受其福積善之家必有餘慶其理豈或爽

哉 廣訓十六條頒行海內另有刻本茲不能悉載

雍正四年八月

上諭國以民爲本民以食爲天朕卽位以來念切民依舉
行耕藉之禮殫盡精誠爲民祈穀於

上帝乃雍正二年三年藉田特產嘉禾有至一莖九穗者
朕心亦以爲偶然之事今據府尹劉於義進呈今
歲藉田所產自一莖雙穗三穗以至八穗九穗皆
碩大堅好異於常穀朕見之心甚慰悅特令宣示
廷臣朕並非以此爲祥瑞誇耀於衆也蓋實有見
於天人感召之理捷於影響無纖毫之或爽朕以

至誠肫懇之心每歲躬耕藉田以重農事卽蒙

上帝降鑒疊產嘉穀以昭休應似此八穗九穗之穀豈人

力之所能強爲亦豈人君所能強之使有乎天人

感應之理朕見之最真最切但恐此心不誠耳誠

則未有不動者卽如從前青海蠢動朕爲邊陲憂

慮虔禱於宮中不數旬而捷音卽至疆圉寧謐又

如前歲夏間近畿雨澤稍愆朕在宮中默禱減膳

修省虔誠叩懇不數日而甘霖大沛禾稼有秋此

皆近年以來朕親行親驗之事至於去年夏秋之

間時常陰雨朕在宮中但覺雨水稍多不知其大

爲民害而李維鈞並不將畿輔被潦實情具奏是以朕竟不聞知未曾早爲虔禱殫竭誠心以挽天意而紓民困及蔡珽署直隸總督印務詳悉奏聞朕宵旰憂勤幾廢寢食於是截漕發倉多方賑濟京城設廠各邑興工俾窮民皆得糊口是以地方雖被水災而小民不至流離失所朕撫綏閔恤之念實爲迫切今歲二麥豐收禾黍暢茂此皆

上天俯鑒朕衷故加惠黎元而錫以盈寧之慶也蓋天生民而立之君鑒觀在上人君一念敬謹政事無闕天必嘉之佑之一念放逸政事有乖天必儆之戒

之此一定之理也況人君撫馭臣庶位處極尊所以賞罰之者獨有

上天耳是以朕每於水旱等事皆實心內省必係朕有過失

上天儆戒示譴也至於各省旱澇之事朕皆視同一體原無彼此之別惟是地方相隔路遠彼地偶有水旱有司未必卽行具報及至奏達朕前而緊急之時已過是以朕無從盡其誠心爲之祈禱此其責則全在本省督撫矣督撫受朕委任之重爲朕養育萬民必視百姓之疾苦如痛癢之在己身一遇水

旱饑饉必思所以致此之由或因本省之政事吏治有闕卽思速爲改易之或因本地之人心風俗不端卽思速爲化導之兢兢業業修省祈禱竭盡誠心一如朕之朝乾夕惕斷無不可以挽回

天意者假若聞朕之政治稍有缺失亦卽直言陳奏不必隱諱如此則官與民聯爲一體臣與君又聯爲一體太和翔洽實意加孚天聽雖高誠呼吸可通矣朕每歲躬耕藉田並非崇尚虛文以爲觀美實是

敬

天勤民之至意禮曰天子爲藉千畝諸侯百畝據此則耕

藉之禮亦可通於臣下矣朕意欲令地方守土之
官俱行耕藉之禮使知稼穡之艱難悉農夫之作
苦量天時之晴雨察地力之肥磽如此則凡爲官
者皆時存重農課稼之心而凡爲農者亦斷無苟
安怠惰之習似與養民務本之道大有裨益著九
卿詳議具奏

雍正四年九月二十九日奉

上諭爲士者乃四民之首一方之望凡屬編氓皆尊之奉
之以爲讀聖賢之書列膠庠之選其所言所行俱
可以爲鄉人法則也故必敦品勵學謹言慎行不

愧端人正士然後以聖賢詩書之道開示愚民則
民必聽從其言服習其教相率而歸於謹厚或小
民偶有不善之事卽懷愧恥之心相戒勿令某人
知之如古人之往事則民風何患不淳世道何患
不復古耶朕觀今世之士雖不乏閉戶勤修讀書
立品之輩而蕩檢踰閑不顧名節者亦復不少或
出入官署包攬詞訟或武斷鄉曲欺壓平民或違
抗錢糧藐視國法或代民納課私潤身家種種卑
污下賤之事難以悉數彼爲民者見士子誦讀聖
賢之書而行止尙且如是則必薄待讀書之人而

並且輕視聖賢之書矣士習不端民風何由而正
其間關係極爲重大朕自卽位以來加恩學校培
養人材所以教育士子者無所不至宜夫天下之
士皆鼓舞奮興爭自濯磨盡去其佻儻之習矣而
內外諸臣條奏中臚列諸生之劣蹟請行嚴懲者
甚多朕思轉移化導之法當先端其本原教官者
多士之儀型也學臣者教官之表率也教官多屬
中材又或年齒衰邁貪位竊祿與士子爲朋儔視
考課爲故套而學臣又但以衡文爲事任教官之
因循怠惰苟且塞責漫不加察所以倡率之本不

立無恠乎士習之不端而風俗之未淳也朕孜孜
圖治欲四海之大萬民之衆皆向風而慕義革薄
而從忠故特簡督學之臣慎重教官之職欲使自
上而下端本澄原以收實效也凡爲學臣者務須
持正秉公宣揚風化於教官之稱職者卽加薦拔
溺職者卽行參革爲教官者訓誨士子悉秉誠心
如父兄之督課子弟至於分別優劣則至公至當
不涉偏私如此各盡其道則士子人人崇尚品詣
砥礪廉隅且不但自淑其身而羣黎百姓日聞善
言日觀善行以生其感發之念風俗之不變庶幾

其可望也特諭

鉅野縣知縣

臣

寥開春立石

雍正四年十月初八日奉

上諭國家設學校以儲養人材鄉會廷試拔其尤者而用

之卽古選士造士之遺意也但士子作文有一日

之長短縱使主司公明搜羅豈能無遺況去取惟

憑文藝其人品之高下才能之優絀無由得知每

有出羣拔萃之才屢試不售卽或晚得一第而年

力衰邁不堪爲國家任使朕思各省學政奉命課

士黜劣舉優係其專責嗣後學政三年任滿將生

員中實在人品端方有猷有爲有守之士大省舉
四五人小省二人送部引見朕親加考試酌量擢
用現在報滿各學政卽遵照薦舉其到任未久者
如有所知亦卽舉出夫一省而舉數士不可謂無
人學政巡歷各府三年之久日與士子相親考文
察行不得謂不知但能虛公衡鑑所舉必得其人
且風聲所樹凡讀書士子必皆鼓舞振興力學敦
行求爲有用之儒於士習人材大有裨益該學政
其各寔心奉行毋得苟且塞責如有徇私冒濫等
弊必嚴加治罪特諭

鉅野縣知縣

臣

廖開春

縣丞

臣

王士駿

雍正五年三月

上諭自古帝王致治誠民莫不以重農爲先務書陳無逸

先知稼穡之艱難詩載豳風備述田家之力作論

語云百姓足君孰與不足孟子云民事不可緩也

蓋國以民爲本民以食爲天農事者帝王所以承

天養人久安長治之本也我國家撫綏寰宇

聖祖仁皇帝臨御六十餘年深仁厚澤休養生息戶口日

增生齒益繁而直省之內地不加廣近年以來各

處皆有收成其被水歉收者不過州縣數處耳而

米價遂覺漸貴閩廣之間頗有不敷之慮望濟於鄰省良由地土之所產如舊而民間之食指愈多所入不足以供所出是以米少而價昂此亦理勢之必然者也夫米穀爲養命之寶人旣賴之以生則當加意愛惜而不可萌輕棄之心且資之者衆尤當隨時樽節而不可縱口腹之欲每人能省一勺在我不覺其少而積少成多便可多養數人若人人如此則所積豈不更多所養豈不更衆乎養生家以食少爲要訣固所以頤神養和亦所以節用惜福也况脾主於信習慣便成自然每見食少

之人其精神氣體未嘗不壯此顯而可見者至於
各省地土其不可以種植五穀之處則不妨種他
物以取利其可以種植五穀之處則當視之如寶
勤加墾治樹藝菽粟安可舍本而逐末棄膏腴之
沃壤而變爲果木之場廢饗殮之恒產以倖圖贏
餘之利乎至於烟葉一種於生人日用毫無裨益
而種植必擇肥饒善地尤爲妨農之甚者也小民
較量錙銖且但顧目前而不爲久遠之計故當圖
利之時若令其舍多取寡棄重就輕必非其情之
所願而地方官遽然繩之以法則勢有所難行轉

滋紛擾惟在良有司勤勤懇懇諄切勸諭俾小民
豁然省悟知稼穡爲身命之所關非此不能生活
而其他皆不足恃則羣情踴躍不待督課而皆盡
力於南畝矣朕聞江南江西湖廣粵東數省有一
歲再熟之稻風土如此而仍至於乏食者是地土
之力有餘而播種之功不足豈非小民習於怠惰
而有司之化導者有未至耶或者曰米穀太多則
價賤而難於糶賣昔人有穀賤傷農之說諺語所
謂熟荒者此則不必過慮假若小民勤於耕作收
穫豐盈致於價賤而難於出糶朕必多發官價以

糴買之使重農務本之良民獲利而有餘資也朕
生平愛惜米穀每食之時雖顆粒不肯拋棄以朕
玉食萬方豈慮天庾之不給而所以如此樽節愛
惜者實出於天性自然之敬慎並不由於勉強且
以米穀乃

上天所賜以生養萬民者朕爲天下生民主惟有敬謹寶
重仰冀

天心默佑雨暘時若歲獲有秋俾小民家有蓋藏人歌樂
土朕旣爲億萬生民計不敢輕忽

天貺爾等紳衿百姓獨不自爲一身一家之計乎朝夕養

生之需旣受

上天之賜若果加意愛惜隨時樽節則

天必頻加錫賚長享盈寧之福若恣情縱欲暴殄天物則

必上千

天怒不蒙眷賚而水旱災祲之事皆所不免其理豈或爽

哉又聞江南廣西地方竟有以米穀飼養豚豕者
試思穀食之與肉食孰重孰輕孰緩孰急而乃以
上天之所賜小民終歲勤勞之所獲者爲衆養物類之用
豈不干

天和而輕民命乎朕所以惓惓訓諭者惟期天下之人專

務本業以杜浮靡愛惜物力以圖久遠其體朕敬
遜不干

天庥勤恤民隱之意則爾等家室必益至於豐饒爾等子
孫必永綿其福澤思之思之毋忽朕言著將此曉
諭內外官民人等並通行遠邇僻壤咸使聞知

恭紀志

宸翰

康熙二十七年頒

御書萬世師表匾額於學宮

雍正三年頒

御書生民未有匾額於學宮

乾隆三年頒

御書與天地參匾額於學宮

嘉慶三年頒

御書聖集大成匾額於學宮

道光元年頒

御書聖協時中匾額於學宮

康熙年正月日

御製孔子贊

正書在文廟

序曰蓋自三才建而天地不居其功一中傳而聖人代宣其蘊有行道之聖得位以綏猷有明道之聖立言以垂憲此正學所以常明人心所以不泯也粵稽往緒仰溯前徽堯舜禹湯文武達而在上兼君師之寄行道之聖人也孔子不得位窮而在下秉刪述之權明道之聖人也行道者勲業著於

一朝明道者教思周於百世堯舜文武之後不有
孔子則學術紛淆仁義湮塞斯道之失傳也久矣
後之人而欲探二帝三王之心法以爲治國平天
下之準其奚所取衷焉然則孔子之爲萬古一人
也審矣朕巡省東國謁祀闕里景企滋深敬摛筆
而爲之贊曰

清濁有氣剛柔有質聖人參之人極以立行著習
察舍道莫由惟皇建極惟后綏猷作君作師垂統
萬古曰惟堯舜禹湯文武五百餘歲至聖挺生聲
金振玉集厥大成序書刪詩正禮定樂旣窮象繫

亦嚴筆削上紹往緒下示來型道不終晦秩然大
經百家紛紜殊塗異趣日月無踰羹牆可昭孔子
之道惟中與庸此心此理千聖所同孔子之德仁
義中正秉彝之好根本天性庶幾夙夜勗哉令圖
溯源洙泗景躅唐虞載歷庭除式瞻禮器摘毫仰
贊心焉遐企百世而上以聖爲歸百世而下以聖
爲師非師夫子惟師於道統天御世惟道爲寶泰
山巖巖東海泱泱牆高萬仞夫子之堂孰窺其藩
孰窺其徑道不遠人克念作聖

戶部尚書文華殿大學士臣張玉書奉

勅敬墓

康熙二十五年七月初四日

御製四配贊

正書在文廟

顏子贊

聖道早聞天資獨粹約禮博文不遷不貳一善服膺萬德來萃能化而齊其樂一致禮樂四代治法兼備用行舍藏王佐之器

曾子贊

洙泗之傳曾以得之一貫曰唯聖學在茲明德新民止善爲期格致誠正均平以推至德要道百行

所基纂承統緒修明訓辭

子思子贊

於穆天命道之大原靜養動察庸德庸言以育萬
物以贊乾坤九經三重大法是存篤恭慎獨成德
之門卷之藏密擴之無垠

孟子贊

哲人既萎楊墨昌熾子輿闢之曰仁曰義性善獨
闡知言養氣道稱堯舜學并功利煌煌七篇並垂
六藝孔學攸傳禹功作配

戶部尚書文華殿大學士臣張玉書奉

勅敬摹

康熙二十八年閏三月十六日

御製平定準噶爾告成太學碑文

遼矣山戎薰粥旃裘毳幕之人界以龍沙畜其驪
奚雖無恒業厥有分部蓋自元黃剖判萬物芸生
東夷西夷各依其地謬舉淳維未爲理據皇古莫
紀其見之書史者自周宣太原之伐秦政亘海之
築莫不畏其侵軼華夏是虞自時厥後一二奮發
之君慨然思挫其鋒而納之宥然事不中機材不
副用加以地遠無定處故嘗勞衆費材十損一得

搢紳之儒守和親介冑之士言征伐征伐則民力
竭和親則國威喪於是有守在四夷羈靡不絕地
不可咈民不可臣之言興矣然此以論漢唐宋明
之中夏而非謂我

皇清之中夏也

皇清荷

天之龍興東海撫華區有元之裔久屬版章歲朝貢從征
狩執役惟謹準噶爾厄魯特者本有元之臣僕叛
出據西海終明世爲邊患至噶爾丹而稍強吞噬

鄰蕃闌入北塞我

皇祖三臨朔漠用大破其帥元惡伏冥誅協從遠遯跡丹
俾遺種於我喀爾喀厥姪策妄阿拉布坦收其遺孽
僅保伊犁故嘗索俘取地無敢不供逮夫部落滋聚
乃以襲哈密入西藏準夷之勢於是而復張兩朝命
將問罪雖屢獲捷而庚戌之役逆子噶爾丹策楞能
用其父舊人乘我師怠掠畜於巴里坤擣營於和卜
多於是而準夷之勢大張然地既險遠主客異焉此
勞往而無利彼亦如之故額爾德尼招之敗彼亦以
彼貪利而深入也

皇考謂我武旣揚不可以旣允其請和以息我衆予小子

敬奉

先志無越思焉旣而噶爾丹策楞死子策妄多爾濟那本
扎爾暴殘喇嘛達爾濟篡奪之達瓦齊又篡奪喇
嘛達爾濟而酗酒虐下尤甚焉癸酉冬都爾伯特
台吉策楞等率數萬人來歸越明年秋渾特台吉
阿睦爾撒納和碩特台吉班珠爾又率數萬人來
歸朕謂來者不可以不撫而撫之莫若因其地其
俗而善循之且毋令滋方來之患於我喀爾喀也
於是議進兩路之師問彼罪魁安我新附凡運餉
籌馱長行利戰之事悉備議之始熟經於庚戌之

艱者咸懼蹈轍惟大學士忠勇公傳恒見與朕同
而新附諸台吉則求之甚力朕惟犁庭掃穴卽不
敢必然喀爾喀之地必不可以久居若爾人毋寧
用其鋒而觀厥成卽不如志亦非所悔也故凡禡
旗命將之典概未舉行亦云偏師嘗試爲之耳塞
上用兵必以秋而阿睦爾撒納瑪木特請以春月
欲乘彼馬未肥則不能邀朕謂其言良當遂從之
北路以二月丙辰西路以二月己巳各啟行哈密
瀚海向無雨今春乃大雨咸以爲時雨之師入賊
境凡所過之鄂拓克携羊酒糗糒迎恐後五月乙

亥至伊犁亦如之達瓦齊於格登山麓結營以待
兵近萬我兩將軍議以兵取則傷彼必衆彼衆皆
我衆多傷非所以體上慈也丁亥遣阿玉錫等二
十五人夜斫營覘賊向賊兵大潰相蹂躪死者不
可勝數來降者七千餘我二十五人無一人受傷
者達瓦齊以百餘騎竄六月庚戌獮人阿奇穆霍
集斯伯克執達瓦齊來獻軍門準噶爾平是役也
定議不過二人籌事不過一年兵行不過五月無
亡矢遺鏃之費大勲以集遐壤以定豈人力哉

天垂佑而授之事機設不奉行之以致坐失者多矣可與
樂成不可與謀始亦謂蚩蚩之衆云耳豈其卿大
夫之謂旣克集事則又曰苟知其易將勸爲之夫
明於事後者必將昧於機先朕用是寒心且準噶
爾一小部落耳一二有能爲之長而其樹也固焉
一二暴失德之長而其亡也忽焉朕用是知思武
成而勒碑文廟例也禮臣以爲請故據實事書之
其辭曰

茫茫伊犁大幹之西匪今伊昔化外羈縻條支之
東大宛以南隨畜獵獸蟻聚狼貪乃世其惡乃恃

其遠或激我攻而乘我緩其計在斯其長可窮止
戈靖邊化日薰風不侵不距不來其那款關求市
亦不禁訶始慕希珍終居奇貨吏喜無事遷就斯
悞漸不可長我豈懼其豈如宋明和市之爲旣知
其然飭我邊吏弗縱弗嚴示之節制不仁之守再
世斯斬篡奪相仍飄忽荏苒風沙革面煎鞏披忱
集泮飛鶚食黠懷音錫之爵位榮以華裾膝前面
請願效前驅兵分兩路雪甲霜鋒先導中堅如鼂
錯攻益以後勁蒙古舊屬八旗子弟其心允篤二
月卜吉牙旗飄飄我騎斯騰無待折膠泉滴於磧

蕪苗於路我衆懽躍謂有

天助匪啗我衆新附亦云黃髮未覩水草富春烏魯木齊
波羅塔拉台吉宰桑紛紛款納牽其肥羊及馬潼
酒獻其屠耆合掌雙手予有前諭所禁侵凌以茶
交易大愉衆情衆情旣愉來者日繼蠢達瓦齊擁
兵自衛依山據淖惟旦夕延有近萬人其心十千
勇不目逃掄二十五曰阿玉錫率往賊所銜枚夜
襲直入其郭揮矛拍馬大聲疾呼彼人旣離我志
斯合突將無前縱橫鞚鞞案角鹿墀騰種東籠自
相狼籍孰敢撓鋒狐竄鼠逃將往異域狃部遮之

寬渠斯得露布既至告

廟受俘凡此歲功荷

天之衢在古周宣二年乙亥淮夷是平常武詩載越我

皇祖征噶爾丹命將禡旗亦乙亥年既符歲德允協師貞

兵不血刃漠無王庭昔時準夷弗恭弗聽今隨師

行爲師侯尉昔時準夷日戰夜征今也偃臥知樂

人生曰匪準夷曰我臣僕自今伊始安爾游牧爾

牧爾畊爾長孫子曰無向非豈有今是

兩朝志竟億載基成側席不遑保泰持盈

巡幸東魯黎庶擁馬瞻拜命訶警者弗禁得以察

其疾苦

康熙二十二年甲寅

東來端爲重民生不事汾陰泰畤名井里儼存齊
國俗田疇還憶歷山耕暫寬羽騎鉤陳衛一任邨
童野老迎敢道爾言勤訪察止期治理得輿情

舟中錄朱子句

康熙四十一年詩載麟川書
完御碑亭

朝吟東渚風夕弄西嶼月人境諒非遙湖山自幽
絕

錄唐人常建三日尋九庄七絕

詩載御碑亭

雨歇楊林東渡頭永和三日盪輕舟故人家住桃
花岸直到門前溪水流

見泰安等州縣饑民亟命設法賑濟

東路行輦到人食正薦饑呼庚兒女盼宸遊衆所
依邨中皆菜色散去掩柴扉救荒先發穀轉漕迭
如飛兩旬無多日有司報民歸地丁旣已貸私派
務全希盡力專邦本留意欲國肥麥秋猶可望黎
民其庶幾

降旨免山東破水州縣積欠詩以誌事

夏諺曰遊豫其義重休助此時昨秋潦宵旰塵憂
慮春來寬大詔率已屢頒布經過切體察老幼迎
蹕路雖云無菜色猶懼有薪措廉知餘積欠期緩

終應賦不如一與豁俾免催呼遽安心勤耕農有秋冀可遇

豁免山東積欠詩以志事 乾隆二十九年甲申

輸多欠少豈能無積少爲多遂屢遭江浙已胥罷

我澤青齊忍聽向其隅率因災歉成陳負櫛與優

蠲俾眾娛 昨崔應階來迎驛詢知濟南各屬乾隆二十七年以前因災緩貸各項積至十

三萬有奇因降旨概予豁免俾民力益資充贍絜矩要從民所好爲民父

母意殷吾

捐資賑濟

三萬市杏因捐資賑濟
三萬市杏因捐資賑濟

賑濟東鄉

賑濟東鄉
賑濟東鄉

海軍青齊賑濟
海軍青齊賑濟

賑濟父老
賑濟父老

賑濟山東賑濟
賑濟山東賑濟

賑濟四縣

賑濟不暇
賑濟不暇

恭紀志下

恩恤

順治八年欽奉

上諭山東水災頻乘亟需賑濟以倉穀賑窮民以學租賑

貧士

順治十一年欽奉

恩詔順治六七兩年直省地丁本折錢糧拖欠在民者悉

予豁免

順治十三年欽奉

恩詔順治八九兩年地丁本折錢糧拖欠在民者悉予豁

免

康熙三年欽奉

恩詔順治十五年以前民欠錢糧概行豁免

康熙四年欽奉

恩詔順治十六十七十八等年各項錢糧俱令蠲除

康熙十年欽奉

恩詔康熙四五六等年直省民欠地丁錢糧盡予豁免

康熙二十二年奉

聖諭東巡經行山東各州縣衛所丁銀曲阜縣地丁銀

行豁免

康熙二十三年

聖祖仁皇帝稽古東巡十九日壬午昧爽

發德音

詔自康熙十三年起至二十二年拖欠漕項錢糧著自康熙二十三年起每年帶征一年以免小民一時並徵之累東巡經過地方宜俱加恩恤著將康熙二十四年應徵地丁盡行捐免

康熙二十五年

詔山東省本年地丁錢糧盡行蠲免並令地方官勸諭紳衿富室將地租酌量減徵嗣後捐免錢糧之省將

蠲免之數分作十分以七分蠲免業戶以三分蠲免佃種之民

康熙三十年

詔河南省明歲漕糧已頒諭免徵外湖廣江西浙江江蘇

安徽山東應出漕米自康熙三十一年始以次各

蠲一年

謹按山東省係三十六年輪免

康熙三十一年戶部覆准山東存貯捐穀二十八

萬九千餘石將此酌量借給窮民接濟春耕俟秋

成照例償還

康熙四十二年

皇帝

閱河至山東泰安州

祭岱遣領侍衛內大臣於

嶽廟致祭正月十六日戶部奉准

諭旨泰安郟城魚臺汶上嘉祥鉅野濟寧七州縣雖未成

災四十一年未完錢糧俱著蠲免四十二年地丁

錢糧著分三年帶徵

康熙四十二年九月戶部奏請山東賑濟饑民差

戶部賢能司官馳驛速往截留漕運尾船米五十

萬石交與山東地方官並派出八旗官員各支庫

銀三千兩往山東會同地方官賑濟饑民

康熙四十二年八月

上諭朕四次經過山東於民間生計無不深知東省與他
省不同田間小民俱依有身家者爲之耕種豐年
則有身家之人所得者多而貧民所得之分甚少
一遇凶年則已身並無田畝產業有力者流移於
四方無力者卽轉死於溝壑此等情狀爾東省大
臣僚庶及有身家者亦當深加體念似此荒歉之
歲雖不能大爲拯濟若能輕減所入田租以贍養
其佃戶不但深有益於窮民卽爾等田地日後亦

不至荒蕪如果民受實惠豈不勝謝恩千百倍耶
這奏謝已悉所司知之

康熙四十三年奉

上諭山東全省四十四年地丁銀著蠲免有積年錢糧拖欠在民者亦著查明免徵

康熙四十四年閏四月二十日山東巡撫趙世顯
奉 上諭山東四十四年地丁銀著蠲免有積年錢糧拖欠在民者亦著查明免徵

諭旨朕因四方無事車駕南巡得訪民情深知利弊回舟
山左見麥秋大熟民無菜色朕心甚慰凡鑾輿所
臨加恩宥過企望刑期無刑也東省前歲儉收衣

食惟艱所以犯法者衆嘗念臨下之道惠化爲先
原情之仁含育在宥是宜悉除愆咎盡起枯沉可
將山東所屬地方人犯亦照江南浙閩恩例概從
末減自康熙四十四年閏四月二十日以前凡罪
犯詔款不應赦者不赦外其餘死罪以下已發覺
未發覺俱著減等發落四十三年秋審奉旨監候
緩決者一併減等發落仍開具人數奏聞但山東
人性強悍輕生爲盜者頗多爾等不時訓誨教養
以副朕愛惜人命之至意

康熙四十五年奉

諭山東省自康熙四十二年各府屬未完民欠銀一百六十九萬一千七百兩有奇糧五千九百石有奇或現在徵收或歷年帶徵俱著通行蠲免俾小民實除逋賦之累倘應徵舊欠有現完納在官者卽准抵本年正賦

康熙四十九年奉

上諭朕膺

天眷祇承

列祖鴻庥統育萬方子育兆庶厯懷至治宵旰靡寧幸際海宇同風邊隅向化遐邇中外帖然衽席之安是

皆仰荷

天地

祖宗福佑之所致也方朕八齡踐祚之初

太皇太后問朕何欲朕對臣無他欲惟願天下治安生民

樂業共享太平之福而已迄今五十年矣惓惓此

心未嘗一日稍釋每思民爲邦本勤恤爲先政在

養民蠲租爲急數十年以來除水旱災傷例應蠲

免外其直省錢糧次第通蠲一年者屢經舉行更

有一年蠲及數省一省連蠲數年者前後蠲除之

數據戶部奏報通共會計已逾萬萬畝一無所顧

惜百姓足君孰與不足朝廷恩澤不施及百姓將
安施乎朕每歲供御所需概從儉約各項奏銷浮
冒亦漸次清釐外無師旅饑餽之煩內無工役興
作之費因以歷年節省之儲畜爲頻歲渙解之恩
膏朕之蠲免屢行而無國計不足之慮亦恃此經
畫之有素也比來省方時邁已歷七省南北人民
風俗及日用生計靡不周知而民所以未盡殷阜
者良由承平旣久戶口日繁地不加增產不加益
日用不繼理有必然然朕洞燭此隱時深軫念爰
不靳敷仁用甦民力明年爲康熙五十年思再沛

大恩以及吾民原欲將天下錢糧一概蠲免因衆大臣集議恐各處兵餉撥解之際兵民驛遞益致煩苦細加籌畫悉以奏聞故自明年始於三年以內通免一周俾遠近均霑德澤直隸奉天浙江福建廣東廣西雲南貴州各巡撫及府尹所屬除漕項錢糧外五十年應徵地畝銀共柒百貳拾貳萬陸千壹百兩有奇應徵人丁銀共壹百壹拾伍萬壹千兩有奇俱著察明全免並歷年舊欠其壹百壹拾捌萬伍千肆百兩有奇亦俱著免徵其五十年五十二年應蠲省分至期候旨行

謹按山東省係五十年

二年
輸蠲

康熙五十一年奉

上諭朕宵旰孜孜勤求民瘼永惟惠下實政無如除賦蠲
租除每歲直省報聞偶有水旱災傷照輕重分數
蠲免正供仍加賑卹外將天下地丁錢糧自康熙
五十年爲始三年之內全免一周使率土黎庶普
被恩膏除將直隸奉天浙江福建廣東廣西四川
雲南貴州及山西河南陝西甘肅湖南湖北各直
省五十年五十一年地丁錢糧一概蠲免歷年舊
欠錢糧一併免徵外所有江寧安徽山東江西各

撫屬除漕項外康熙五十二年應徵地畝銀共四百八十二萬九千六百四十四兩有奇人丁銀共一百三萬五千三百二十五兩有奇著一併免徵計三年之內總免過天下地畝人丁新徵舊欠共銀三千二百六萬四千六百九十七兩有奇各該督撫務須實心奉行體朕軫念民生至意

雍正元年奉

上諭朕惟治民之道在愛養民力蓋民力寬舒則元氣自復此裕阜之要務也山東山西河南三省連年田稼歉收朕軫念窮黎已發帑賑濟復將現年錢糧

盡行緩征而歷年民欠帶征之項若仍行比追緩
新而征舊與此姓終無裨益目今時雨霑足秋禾
滋茂登獲在望俾耕鑿小民終歲無催歛之煩室
家有蓋藏之慶則力既有餘輸將亦易來年自必
急公完賦爾部將山東省康熙五十八年到六十
一年分年帶征未完錢糧山西省康熙五十九年
至六十一年緩征錢糧作速行文三省巡撫俱著
停征一年務使里井霑恩胥吏無擾以副朕愛養
民力之意爾部卽遵諭行

雍正八年奉

上諭前據總河奏報南河水溢情形知山東地方有發水
被淹之州縣已諭令該撫率同有司就近加意賑
恤茲據總督奏稱兗州府屬之滋陽曲阜寧陽泗
水嶧縣金鄉魚臺濟寧汶上曹州屬之嘉祥鉅野
濟南府屬之歷城章邱淄川長山新城齊東東昌
府屬之聊城堂邑莘縣冠縣濮州屬之范縣朝城
青州府屬之臨淄樂安沂州泰安州莒州屬之新
泰萊蕪東平州并州屬之東阿東平所轄州屬之
蒙陰等處於六月二十一至二十六等日風雨
交作山水陡發河流驟長其傍山臨河處所有窪

下之地田禾室廬皆被水淹浸查雍正三年被水
仰蒙特頒諭旨將田地被淹房屋倒塌之窮民悉
加恩賜今年被水之民可否將生計蕭條不得收
穫者動用存倉穀石大口每月給穀三斗小口每
月給穀一斗五升各給兩月口糧其房屋倒塌無
力修理者於藩庫存公銀兩內每戶酌給銀壹兩
五錢以爲葺屋之費如蒙俞允卽檄飭藩司道府
督同地方官實心辦理等語覽奏朕心深爲軫念
著照該督所請轉飭司道等官仰體朕心按戶速
行散賑務令均霑恩澤其無力修理房屋者著賞

給銀兩速行修葺俾得安堵棲身勿使一夫失所
至於賞給口糧著於兩月之外增添一個月其應
免錢糧之處卽曉諭停徵著該督撫將如何蠲免
之處確查定議奏聞

雍正十一年

上諭山東巡撫岳濬奏報東省解司耗羨從前因公動用
條款紛繁多有浮濫之弊自雍正六年經前任督
臣田文鏡逐一查核應補應銷分別清楚此後凡
有動用皆係地方應辦之項並無浮濫茲據布政
司鄭禪寶報稱耗羨銀兩現存庫銀七十五萬四

千兩有零朕已降旨將豫省本年地丁錢糧蠲免四十萬兩以加惠通省百姓今東省亦應一體加恩著將雍正十一年地丁錢糧照豫省之例蠲免四十萬兩卽以存貯之耗羨照數撥補還項該省督撫務飭有司實力奉行俾閭閻均霑實惠倘有不肖官吏從中作弊私徵侵蝕者一經發覺定行從重治罪

乾隆十年奉

上諭普行輪免一年錢糧

乾隆十二年七月十五日奉

恭紀

上諭曹州府屬之荷澤鄆城單縣城武被水窮黎深
可憫惻著該撫加意撫恤所有應征新舊錢糧概
緩徵收

乾隆十五年正月初二日內閣奉

上諭各省耗羨銀兩以備地方一切公用向因漫無稽考
是以條列章程該部嚴加察核朕思有正供而後
有耗羨耗羨非正供可比其未完之項雖應一體
催徵但輸將不無拮据朕巡幸所至地方應酌量
加恩以舒民力直隸屢經巡歷今春暨秋清蹕時
臺命駕河汴明歲卽當南幸江浙山東亦所必經

所有耗羨內直隸山西河南浙江四省未完銀兩
全行豁免江蘇安徽山東三省未完銀兩蠲免十
分之六著該督撫確查實數毋令吏胥借端挪抵
正耗混淆暗行侵蝕倘有蒙混滋弊卽行參奏從
重治罪上司稍有徇隱一併嚴加議處務使閭閻
均霑實惠以普恩膏

乾隆十六年正月二十六日內閣奉

上諭朕清蹕南巡道由山左所有經過州縣旣已特沛恩
膏茲攬轡觀風知連歲有秋視戊辰東巡之時間
閭大有起色爲之慶慰尙念該省積年緩徵帶徵

未完穀石皆因災出借之項雖疊遇有收而按年
催比民力不無拮据著將被災借穀應於庚午年
起分作五年帶徵及鄉平等屬帶徵未完穀共九
十七萬五千餘石概行蠲免以昭格外優恤之至
意

乾隆三十年正月二十四日內閣奉

上諭朕清蹕時巡適經山左昨已特沛恩膏降旨將所過
地方本年額賦蠲免十分之三東省連歲豐稔民
氣恬熙朕攬轡所覩深爲欣慰但念該省尚有積
年欠項皆係從前無力輸將所致若據限催科仍

恐稍有拮据著加恩將濟南武定兗州曹州東昌
等府屬乾隆二十六七兩年未完因災緩徵地丁
暨民借麥本牛具等銀六萬二千九百五十餘兩
又濟南武定兗州東昌曹州沂州等府屬乾隆十
二年至二十七等年未完因災緩徵暨民借年久
常平倉穀七萬五千四百四十餘石概行豁免俾
閭閻益滋饒裕該撫其善體朕意率屬實力奉行
務期膏澤下施均霑實惠該部卽遵諭行

乾隆三十一年正月初三日奉

上諭朕統御萬方孜孜求治惟以愛育黎元爲念自御極

自以來蠲賜所逮不下千億萬乾隆十年曾恭依

皇祖普免直省錢糧恩例蠲除天下額徵正賦二千八百

萬有奇期斯民家給人足咸臻樂利惟歲運漕米

向以供給俸餉兵精之用非水旱特蠲例不普免

夫八政以食爲先閭閻蓋藏尤資饒裕恭閱

皇祖實錄康熙三十年

特頒恩旨將各省起運漕糧通行蠲免一週大澤均霑慶

逾常格仰惟

皇祖冲齡踐祚臨御之三十年春秋未及四十朕年二十

有五始登大寶膺祺受祉迄今亦閱三十年際

重熙累洽之會必世昌期均符泰運其爲慶幸倍深茲荷

蒙

上天眷佑

列聖鴻庥函夏謐寧疆宇式闢北庭西域二萬餘里咸隸
版圖外有耕屯之獲內無餽餉之勞且連歲年穀
順成庶務豐殖京通倉貯儘有餘粟

天既誕貽樂歲惠洽昇平朕自當仰體

天心以推恩黎庶是用敬承

嘉貺懋繼

前謨使薄海億兆並裕倉箱之慶所有湖廣江西浙江江

蘇安徽河南山東應輸漕米著照康熙年間之例
於乾隆三十一年爲始按年分省通行蠲免一次
其江寧京口杭州荊州等處駐防地方該省漕米
既蠲所有佔需兵食如何預爲籌辦並各省蠲免
次第應行酌辦各事宜著該部速行定議具奏

山東

省蠲漕糧在三十一其隨漕應徵米經巡撫崔
應階奏准一併緩徵俟次年徵漕時隨正帶徵

乾隆三十二年正月初二日奉

上諭昨秋東省武定濟南東昌泰安兗州曹州等府屬瀕
臨運河之處偶被水災業已飭令該撫加意撫恤
蠲賑兼施俾無失所但念新春東作方興距麥秋

尙遠無力貧民口食尙未免拮据著加恩將被災較重之惠民陽信海豐樂陵商河濱州利津霑化蒲臺禹城聊城堂邑博平茌平莘縣高唐東昌衛等十七屬及被災次重之齊河濟陽臨邑長清陵縣德州德平原德州衛東平東阿東平所金鄉魚臺濟寧嘉祥汶上壽張濟寧衛城武定陶鉅野鄆城濮州范縣觀城朝城清平臨清衛等二十九屬無論極次貧民再行加賑一月俾春初力作之時得資接濟該撫其董率所屬實力奉行務使窮黎均霑實惠該部遵諭速行

乾隆三十五年正月初一日奉

上諭朕寅承丕緒撫有萬方申旦求衣無日不以勤恤民
依爲念是以邵農省歲減賦緩征不靳多費帑金
祈閭閻其臻康阜溯在乾隆十一年丙寅朕御宇
周旬肇敷閭澤曾恭依

皇祖普免天下錢糧恩例蠲除直省額徵正賦二千八百
萬兩有奇越在三十二年丙戌際當必世興仁益
惟比戶饒裕是計復下詔將應徵漕米省分照康
熙年例概蠲一次俾令倉箱盈衍倍積耕餘適年
以來寰宇久寧民氣和樂欽惟

上天孚佑我邦家，
濟錫康年頌符綏。
屢朕膺昊蒼鴻眷，
豈可不究澤推仁，
以與我海內元元答茲嘉既。
我國家席全盛之模，
內外經費度支有贏，
無絀府庫所貯。月羨歲增，
因思天地只此生財之數，
不在上卽在下，
與其多貯在藏，
無寧使茅簷蔀屋自爲流通。
廼者仰紹

列祖貽庥，化成熙洽，
爲民藏富欣際斯辰。
且今年爲朕六十誕辰，
明歲恭逢

聖母八旬萬壽，
普天歡祝慶洽頻年。
尤從來史冊所未有，
是宜更沛非常之恩，
以協

天心而彰國慶茲用乘春頒令誕布陽和著自乾隆三十
五年爲始將各省應徵錢糧通行蠲免一次其如
何分年遞蠲之處著大學士會同該部卽速詳議
具奏

謹按山東省係
三十七年輸免

乾隆三十五年正月初五日奉

諭朕嘉惠閭閻俾益藏富始和布令將直省應徵正賦
普免一周因思有田業戶應納條銀者旣已廣被
恩膏則食力佃農自應亦令其分霑渥澤前次丙
寅普蠲錢糧漕米曾諭令各業戶就所蠲之數量
減佃租伊等亦深知感戴朕恩推施亞旅此次又

值加恩普免著各該督撫遇輪蠲之年徭行勸諭
各業戶等照應免糧銀十分之四令佃戶準直減
租使得一體仰邀慶惠在有田之家歲入所資固
難強其分逮而正供既免食德宜均諒無不共稟
天良歡忻從事佃戶等亦不得因有此旨藉口抗
租以負朕一視同仁至意

乾隆四十二年正月二十四日奉

諭前因

聖母萬壽時宏錫類之仁普蠲各直省錢糧以昭慶惠朕
本欲恭祝

聖母九旬萬壽之年再溥恩施一次茲者

仙馭升遐此後更無可推廣

慈仁之處現在部庫帑項又積至七千餘萬著再加恩自
戊戌年爲始普免天下錢糧仍分三年輪免俾寰
宇億兆人民仍得共被

慈恩永申感慕而朕終天罔極之忱雖不能仰酬萬一庶
幾藉茲稍展其何如輪派年分著戶部卽速悉心
核奏施行

乾隆五十年五月二十七日內閣奉

上諭本年山東省曹州東昌等府屬雨澤愆期麥收歉薄

屢經降旨借給口糧籽種緩征錢糧並截留南漕
二十萬石分貯賑貸以紓民力但現在缺雨州縣
大田尙未能播種者民間口食未免拮据此時急
需量爲接濟所有曹州府屬之荷澤濮州范縣觀
城朝城鄆城城武定陶鉅野俱卽加恩賞給兩個
月口糧

乾隆五十年奉

上諭此次巡幸山左鑒輿經蒞之處閭閻童叟夾道懽迎
備具徵愛戴著再加恩將四十九年五十五十一等
年因災民欠銀兩全行豁免

乾隆五十九年十二月初三日奉

上諭前因六十年乙卯元旦日食上元月食雖薄蝕躔度
可以預行推測所謂千歲日至可坐而致但稽古
史傳所載遇有日食月食等事往往下詔求言以
示修省朕思

上天垂象固宜戒慎而應天以實不以文與其托諸空言
孰若施諸實政前已降旨普免天下應徵漕糧俾
海宇子民共臻樂利今思各省尙有節年民欠及
因災帶緩未完銀穀俱應按限徵輸者小民究因
官欠未清未得遂其含哺之樂朕仰邀

吳眷在位六十年寰宇寧謐景運增隆丙辰年卽屆歸政
今若於朕臨御之年覃敷恩賚俾小民節年欠項
廓然一清得以戶慶盈寧共游化宇所謂以德愛
民孰大於是而修省亦概於是矣以此上應

垂象感召休和實吉祥盛事所有各省節年正耗民欠及
因災緩徵帶徵銀穀著各督撫詳細查明按照各
省所屬之某州某縣實欠在民銀穀若干速行開
單具奏到日降旨豁免並著先將此旨謄黃宣示
俾鄉村鎮市咸使周知得以均霑實惠官吏胥役
等無從影射侵冒以副朕子惠黎元敷錫延禧俾

普天下羣黎無一負欠者喜孰大於是該部卽遵諭行

嘉慶八年十月十六日奉

上諭前因衡工漫溢衝注東省曾經降旨詢問鐵保令將被淹州縣查明災分情形酌量加恩茲據鐵保奏到濮州荷澤東昌衛首當其衝成災最重范縣壽張利津蒲臺各州縣或係黃河大溜經過或當海口出水之區成災自五分至八九分不等等語東省各州縣猝遭洪水淹浸小民蕩析離居深堪惻憫所有被災最重之濮州荷澤東昌衛三州縣衛

本年應徵錢漕各款著加恩全行蠲免次重之范
縣壽張陽穀東阿平陰東平鄆城肥城利津蒲臺
濱州十一州縣俱著按成災分數照例分別蠲緩
其帶徵歷年各款俱著遞緩一年至被水村庄各
照成災分數分別極次貧民給與賑濟其餘被水
較輕勘不成災之定陶曹縣茌平聊城四縣本年
應徵錢漕各年帶徵款項俱著加恩緩至來歲秋
後起徵以紓民力其續報漫水之城武鉅野單縣
長清齊河濟陽歷城齊東青城惠民禹城等州縣
及場竈有無成災之處並著查明具奏另降恩旨

以副朕軫念災區之至意

嘉慶二十三年十二月十二日奉

上諭朕自丙辰元旦仰蒙

皇考高宗純皇帝大廷

授璽寅承丕基兢兢業業旰食宵衣以勤求郅治所願者

四海羣黎家給人足同臻康樂敬惟

皇考臨御六十年普免天下錢糧四次漕糧三次

湛恩汪濊淪浹民心嗣位以來亦思廣施闡惠大賚寰區

始緣教匪不靖軍興孔棘又以黃河泛溢屢舉大

工十餘年間所費帑金數踰七千餘萬國家財賦

歲有常經實有入不敷出之勢是以嘉慶十四年
朕五旬正慶雖恩綸載錫而未能普惠閭閻比年
荷蒙

昊蒼垂祐稂莠蕩除萬方寧謐河流順軌久慶安瀾以正
供所入僅敷國用尙可無虞匱乏朕子惠元元深
念損上益下之義俟將來府藏充盈仍欲覃敷渥
澤明歲嘉慶二十四年爲朕六旬正壽宜先蠲除
積逋俾小民戶免追呼共慶含哺之樂所有各省
節年正耗民欠及因災緩徵帶徵銀穀著各督撫
詳晰查明按照各省所屬之某州某縣實欠在民

銀穀若干速行開單具奏以次降旨豁免並著先將此旨謄黃宣示城鄉村鎮咸使聞知俾官吏胥役無從影射侵欺以期膏澤下沛用副朕惠鮮懷保仁壽斯民之至意該部卽遵諭行

道光元年十月初一日奉

上諭鉅野縣任家莊等一百七十七村庄杜家莊等七十二村庄所有應徵本年錢漕及漕項河銀並臨德等倉銀兩俱緩至道光二年秋後啟徵其有嘉慶二十三、四、五等年舊欠並原緩遞緩錢漕倉穀等項應於本年秋後帶徵者一併緩至道光二年

秋後按最先年分依次遞緩每年祇帶徵二畝

道光三年正月初六日奉

上諭山東其被水勘不成災之鉅野縣等共五十四州縣本年上忙錢糧漕項臨德等倉並攤徵河工運工帮價民佃鹽課地租等項概行緩至秋後啟徵道光五年正月初六日奉

上諭山東被旱較重之鉅野縣觀音集等八十九村庄應徵本年錢糧漕米并臨德等倉漕項河銀及攤徵河工堤工等項均著緩至道光六年秋後啟徵其應徵道光三四兩年舊欠及原緩遞緩錢糧出

借籽種等項均緩至道光六年秋後按最先年分
依次帶徵一年東關廂等九白二十一村庄除本
年錢糧漕項河銀及攤徵堤工河工等項照常徵
收其本年漕米著緩至道光六年秋後啟徵其應
徵道光三四兩年舊欠及原緩遞緩錢漕等項均
緩至道光六年秋後按最先年分依次帶徵一年
道光十二年十月初二日奉

上諭加恩將被水較重之鉅野縣東墟等保段家庄等
一百三十六村庄應徵本年錢糧漕米及漕項河
銀臨德等倉民佃鹽課攤徵河工堤工地租等項

均著緩至道光十三年秋後啟徵

道光十五年以

皇太后六旬萬壽欽奉

恩詔普免十年以前積欠錢糧

道光十六年正月初二日奉

上諭山東省被水被蟲較輕之鉅野縣東隅等保東關
廂等六十五村庄本年上忙新賦及漕項河銀臨
德等倉民佃鹽課併攤徵堤工河工地租等項概
緩至秋後啟徵

道光十六年十一月初一日奉

上諭濟陽聊城鉅野三縣本年秋後應徵青黃不接案
內原緩上忙新賦一併緩至道光十七年秋後啟
徵

道光十九年十月初一日奉

上諭被水較輕之鉅野縣太平保呂衍祖屯等十九村
庄除本年漕米照常徵收外所有本年錢糧漕項
河銀臨德等倉民佃鹽課攤徵堤工河工地租等
項著一併緩至道光二十年秋後啟徵

道光二十年秋後啟徵

鉅野縣志卷二

特調鉅野縣知縣星沙黃維翰少棠氏手訂

編年志

祥異附錄不悉載

星變惟紀奎斐以屬鉅邑分野也

龍門涑水代有紀錄惟紫陽綱目一書上倣春秋
年經月緯揭庶政之綱維垂百世之法鑒史也而
經寓焉郡邑之志舍此曷循舊志惟紀祥異殊少
提綱揭領之義茲特叙時代搜故實自周秦以迄
聖朝凡庶徵之休咎邑境之因革民命之安危皆可按
春籍而求瞭如指掌書有之王省惟歲卿士惟月師
尹惟日紀事蹟而並紀災祥兼以示修省也作編

年志

春秋

隱公十年鄭師入防

杜預註曰昌邑縣西南有西防城

桓公七年春二月己亥焚咸邱

杜預云今山東鉅野縣有咸亭

莊公九年公敗宋師於乘邱

乘邱瑕邱東漢皆屬山陽郡隋書地理志

開皇時曾於鉅野置乘邱縣

莊公十三年夏六月齊人滅遂

杜預云遂國在濟北蛇邱縣南北按

古定陶即今鉅野商嘗封舜後於此郡志以為在寧陽境悞

莊公三十年冬及齊侯遇於魯濟

註云濟水歷齊魯界在魯稱魯

濟即今鉅野

莊公三十二年夏宋公齊侯遇於梁邱杜預云梁邱在高平

昌邑縣西南有梁邱鄉是也彭越以功封梁都定陶之梁邱其後割入縣境土人為立梁王廟

襄公十九年城武城

二十二年庚子孔子生於魯昌平鄉

昭公七年四月甲辰朔日有食之及降婁之次

定公十三年春齊侯衛侯次於垂葭註垂葭改名鄭氏今山東

鉅野縣西南有鄭亭

哀公十四年春西狩獲麟傳曰西狩於大野叔孫氏之車子鉏商獲麟杜

云大野在高平鉅野縣

秦

始皇 二十六年分天下三十六郡置鉅野屬碭郡

二世 三年沛公從碭北攻昌邑

西漢

高帝 遇彭越於昌邑不詳 六年改碭郡爲梁

國 十一年三月丙午封皇子恢爲梁王 高

后七年徙梁王於趙自殺諡曰恭

孝文帝 二年二月乙卯封皇子揖爲梁王 三

年填星在婁 十八年徙淮陽王武於梁國

景帝 元年三月填星在婁幾入還居奎 三年

四月以楚相張尙諫王戊反不聽死之封其子
當居爲山陽侯 六年二月丙戌封梁孝王子
彭離爲濟東王 四月梁孝王薨分梁爲五以
孝王子定爲山陽王

孝武 元光三年春河決瓠子注鉅野 元鼎元
年濟東王彭離有罪廢徙上庸省濟東國爲大
河郡 天漢四年更山陽爲昌邑國封子哀王
髡 元朔二年山陽王定薨 征和四年昌邑
哀王髡薨子賀嗣立

昭帝 元平元年夏四月帝崩大將軍光承皇后

詔迎昌邑王賀詣長安六月入卽位旋以淫亂
廢歸國賜沐邑三千戶

宣帝 地節四年五月山陽雨雹大如鷄子入地

二尺五寸蜚鳥皆死

是年十月大司馬霍禹宗謀反霍后廢

元帝 建昭元年隕石梁國六 五年山陽橐茅

鄉社有大槐吏伐斷之是夜樹復立故地

成帝

河平四年山陽火生石中

陽朔三年隕

石於山陽郡東八

哀帝

建平元年濟陰產嘉禾是年光武帝生於

濟陽官署赤光竟天

四年四月山陽湖雨血

廣三尺長五尺大者如錢小者如麻子後二年王莽擅

朝貴戚大臣多遇害是年高平女子田無嗇生子先未生

二月兒啼腹中及生不舉葬之陌路三日人過

聞啼母掘收養之

王莽始建國元年改山陽爲鉅野郡

東漢

章帝建初二年冬十有二月彗星出婁三度長

八九尺百有六日滅占爲大人憂後四年山陽

郡地震

和帝永元二年正月乙卯金木俱合于塗丙寅

水又在婁辛未水金木又在婁

奎主武庫兵三星會為兵喪水

金木在婁亦為兵又為

匿謀竇氏伏誅之應

八年九月有流星入於

婁

殤帝

延平元年正月丁酉金火在婁

金火合為燥為大人

憂是歲殤帝崩

順帝

陽嘉二年封乳母宋娥為山陽君

帝立與謀故封

之永和六年二月彗星見東方指熒室在奎一

度

桓帝

元嘉元年夏四月不雨梁國饑民相食

延熹九年河水清自東郡至濟北國

靈帝 光和五年彗星出奎逆行入紫宮後三出

六十餘日乃消

占曰彗除紫宮天下易主

獻帝 初平元年山陽太守袁遺與渤海太守袁

紹等起兵誅董卓 興平二年呂布將薛蘭李

封屯兵鉅野曹操收之

晉

武帝 太康元年五月濟陰乘氏木連理 二年

夏六月高平大風折木發屋壞邸閣四十四區

東晉 四年大水

惠帝 元康五年夏四月有星孛於奎至軒轅太

微經三台天陵

是年魯公賈謐遇禍

東晉

成帝 咸康二年正月月犯房南第二星彗星夕

見西方在奎六月辛未有流星大如二斗魁色

青赤光耀地出婁中沒婁北

占曰五穀分藏是歲旱饑

穆帝 永和四年五月熒惑入婁犯填星 七年

三月戊子歲星熒惑合於奎

是年劉顯殺石祗及諸師中土大亂

帝奕 太和元年燕寇兖州陷魯兖州高平數郡

三年夏四月大司馬溫帥師伐燕至金鄉大

旱使將軍毛虎生鑿鉅野河引汶會於濟引舟

自濟入運舳艫四百里

卽桓溫河
詳山水志

安帝 隆安四年二月己丑有星孛於奎長三尺

至閣道紫宮西番入斗魁至三台太微 義熙

三年春正月丙子太白晝見在奎二月熒惑填

星太白辰星聚於奎 五年十二月辛丑太白

犯歲星在奎

占曰魯有兵是年劉
口滅慕容超於魯

南朝宋

文帝 元嘉二年冬十月丙辰白鳥見山陽太守

阮保以聞 七年庚午二月太白犯歲星於奎

十二月有流星長二十餘丈赤色有光經奎至

東壁止 十七年七月壬申甘露降高平方三

十里 二十六年白兔見高平

南齊

武帝 永明六年九月癸巳日蝕婁宿九度

北魏

世祖 神嘉三年十二月丙戌流星首如瓠長二

十餘丈大如數十斛色正赤光燭人面自天船

及河抵奎大星及於壁

高宗 太安四年十一月長星出於奎色白馳行

有尾跡變爲白雲

孝明帝 神龜元年分高平置任城郡

北齊

文宣帝 天保七年廢任城縣置高平郡改魯郡

爲任城郡 天和三年七月己未客星見房心

白如粉絮大如斗長如匹練漸大東行入奎壁

婁凡六十九日而滅

占曰兵喪饑旱

武成帝 河清元年龍見濟州浴堂中

後魏

文帝 太和十五年濟州獻三足鳥

明帝 熙平元年濟州獻白鹿 正光元年夏四

月濟州獻三足鳥

靜帝 興平四年夏五月濟州獻蒼鳥

顯祖 景寧三年濟州獻赤雀

隋

文帝 開皇二年改鉅野屬東平郡初屬任城郡三年

廢高平郡爲任城縣屬兗州 十四年十一月

有彗星孛於奎婁 十五年大水 十六年改

置乘邱縣

煬帝 大業二年庚戌改兗州爲魯郡廢乘邱入

鉅野 三年辛亥正月長星見西方竟天歷奎

婁角亢而沒占曰羣盜並起邑落空虛武陽郡上言河水清

二月彗星見於奎

唐

高祖 武德四年徐圓朗反據任城自稱魯王是

年以縣置麟州復置乘邱 五年徐圓朗平置

兗州麟州廢隸鄆州

太宗 貞觀元年省乘邱入鉅野 二年三月戊

申朔日蝕在婁十一度 十一年五月丙戌朔

日蝕在婁三度

高宗 永徽元年春正月至夏六月濟州河清六

十里 五年三月辛亥日蝕在婁十二度六月

濟州河水清 總章元年大旱

武后 長安二年三月壬戌朔日蝕在婁十度

中宗 神龍二年夏五月旱饑

元宗 開元四年夏蝗食稼聲如風雨 十二年

八月大水 十七年詔封孔子弟子公西赤爲

鉅野侯 二十年大水 天寶元年改齊州爲

魯郡帝東封回駕次濟州

肅宗 乾元元年復改魯郡爲兗州 三年四月

彗星見於婁

德宗 建宗六年閏三月熒惑犯鎮星在奎

憲宗 元和六年三月戊戌有流星大如斛墜充

鄆間聲震數百里野雉皆雊所墜之上有赤氣

如立蛇長丈餘至夕乃滅 十五年三月鎮星

太白合於奎

占曰內兵

二月熒惑鎮星合於奎

占曰主憂

穆宗 長慶三年八月丁酉有流星大如數斗起

西北經奎婁東南去月甚近迸火散落墜地有

聲 四年 兩壞城郭廬舍殆盡

文宗 太和元年大水 四年大雨壞城郭廬舍

殆盡 開成五年秋螟蝗害稼

武宗 會昌四年八月有大星如炬光燭天地自

文奎婁掃西方七宿而隕

宣宗 大中六年水害稼

懿宗 咸通五年彗星見於奎 九年正月彗星

見於奎

五代

後唐

明宗 天成二年六月兗州進三足鳥

後晉

高祖 天福六年九月兗州奏河水東流濶七十

里

後周

太祖

廣順二年置濟州於鉅野任城屬之

白此任城

始屬濟州

宋

太祖

建隆元年春正月甲子太白犯熒惑於婁

二年秋七月濟州河溢 三年春夏大旱濟

州等十餘州苗皆稿蠧生

太宗

至道三年為廣濟軍分鉅野為京東路

乾德五年春三月五星如連珠聚於奎婁之次

占曰有德受命大人奄有四方子孫蕃昌從六
鎮星王者以重致天下重福明年真宗誕生六

年正月壬寅歲星鎮星太白合於婁白雲起東

方長二丈貫月及畢奎婁 開寶元年正月壬

寅歲星與太白合於婁 太平開國元年兗州

獻金龜 三年秋七月辛巳有星如稱權沒於

婁 八年夏五月河大決滑州房村注澶濮曹

濟諸州浸民田壞居民廬舍東南流入淮 端

拱元年閏五月辛亥有星出於奎如半月北行

而沒六月辛未赤氣出婁胃天庾

占曰倉廩有火災

淳化二年三月癸丑鎮星與歲星合於婁 三

十年正月太白熒惑合於婁 五年八月己酉有客星出奎婁間東北謾行至濁沒

真宗 咸平三年河決鄆州王陵埽東南注鉅野壞廬舍甚多 六年六月辛未赤氣出婁胃天廩占田 天禧三年六月乙未河決滑州歷壇濮鄆濟單至徐州與清河合浸城壁不沒者四板 慶歷元年九月己酉星出婁如太白有尾跡西行沒於東壁光明燭地 皇祐元年二月丁卯彗出虛辰見東方西指歷紫微至婁凡一百二十四日而沒九月壬子星出閣道速行至

婁沒有尾跡光明燭地二年七月己丑星出
奎赤黃色西南緩行沒於營室三年八月庚
辰星出婁如太白西北速行沒於濁四年九
月丙午星出婁西北速行入濁五年七月甲
辰星出奎如太白速行沒於危嘉祐三年九
月庚午星出婁向南速行至土司空沒五年
六月己未星出婁東北行至濁沒六年七月
庚己酉有星出婁大如杯赤黃色速行入羽林秋
八月丁巳星出婁東北速行至昴沒

大中祥符四年充屬好蚌生有蝨青色隨齧之

化爲水

神宗 熙寧元年八月甲辰星透雲出虛北如歲

星北緩行奎沒赤黃 二年十二月己丑入奎

七年三月辛亥乃散 四年二月辛巳濟州大

風異常百姓驚恐 七年分鉅野爲京西路

徽宗 建中靖國元年十二月己卯星出婁如金

星西南漫流奎外屏沒赤黃有尾跡光明燭地

四年十二月甲午星出參如杯東南漫流入

軍市沒赤黃有尾跡光明燭地 五年十二月

壬戌星出奎向南急流入倉沒青白有尾跡及

三丈光明燭地聲散如裂帛崇寧五年正月

戊戌彗出西方長六丈斜指東北自奎貫婁入

濁沒

占曰主兵喪大饑

大觀二年十二月癸卯星出奎

如盂西北急流入造父沒青白有尾跡光明燭

地有聲四年五月丁未彗出奎婁光芒長六

丈北行入紫微垣至西北入濁不見

宋自高宗南渡濟州

各路悉爲金有故徽欽以後志宋而兼志金紀其實也

欽宗靖康二年金天會四年康王構次於濟州

十一月庚戌星出婁宿西南

高宗建炎元年金天會五年三月庚辰帝自東

平次濟州 紹興八年金天眷元年五月客星

守婁六月乙巳客星出奎宿

占曰爲兵姦臣僞惑天子

十一

年金熙宗皇統元年權移州治於金鄉 十七

年金皇統七年析任城鉅野置嘉祥縣 二十

一年金海陵王亮天德三年徙濟州治於任城

自此濟州

始治任城

孝宗 乾道元年金世宗雍大定五年正月庚午

其夜白氣星出婁宿漸上經婁胃昴貫畢入參

宿內止 九年金大定十三年三月辛酉辰星

與填星合於婁 淳熙元年金大定十四年正

金史卷之二十一
月丁未辰星與填星合於奎七月辛亥奎宿生
芒

光宗 紹熙三年金章宗璟明昌三年四月戊子
填星與歲星合於奎四年金明昌四年二月
丁酉填星與太白合於婁

寧宗 慶元元年金明昌六年四月丁酉太白晝
見於奎北凡十有六日乃滅六月丙申歲星見
於奎凡百有一日乃滅二年金承安元年九
月丁巳星出奎宿向壁壘陣沒赤白色大如太
白 開禧二年金泰和六年八月有流星如太

白起於婁 嘉定四年衛紹王大安三年山東
河北諸路大旱 七年金宣宗珣貞祐二年濟
州陷於寇翰林應奉李演死之

理宗 紹定二年金正大六年正月丁亥熒惑與
歲星合於婁 五年金大興元年六月己丑歲
星熒惑與熒星合於婁

元

世祖 至元六年復徙濟州於鉅野以任城爲屬
八年升濟州爲濟寧路總管府治任城尋還
府治鉅野 十二年復立濟州治任城屬濟寧

府廢任城縣十三年雲南行省平章賽典赤

始建明倫堂因下其式於諸路十四年夏六

月雨水平地丈餘傷稼十五年遷府於濟州

以鉅野行濟州事是年又以府治歸鉅野而濟

州仍治任城明年升府爲路十七年八月濟

寧路大水平地丈餘傷稼二十三年本路創

立錄事司公廨是年復置任城縣隸濟州二

十六年濟寧等路霜雨傷稼是年三月太陰犯

箕二十八年正月太白熒惑填星聚於奎

成宗元貞元年濟寧路大水二年六月蝗

大德元年妖星出奎 五年夏六月饑 十年

三月大饑是年加封

孔子大成至聖文宣王刻石學宮

武宗 至大元年春二月辛卯濟寧路大饑 七

月雨水平地丈餘暴決入城漂沒廬舍死者十

有八人 二年七月蝗大饑 四年秋七月大

水

仁宗 皇慶元年繪素從祀諸賢像 三年春三

月隕霜殺桑 六年大水 延祐元年閏三月

霜殺桑無蠶 二年詔天下學校皆建尊經閣

六年六月大水傷稼秋八月饑

英宗 至治元年正月太白熒惑填星聚於奎三
月亦如之

泰定帝 泰定元年夏六月濟寧路蝗是月淫雨
水深丈餘漂沒田廬

明宗 天歷元年霖雨傷稼 三年五月蝗 至
順元年閏七月詔加

孔子父母及顏回曾參孟軻程顥程頤封爵是年濟寧
路總管府徐 令主簿樊遜續修麟鳳亭於縣

治北 三年夏蝗有蟲夜食桑晝匿土中人莫

能捕五月大水

文宗 至順二十六年春二月黃河北徙民皆被害

順帝 元統二年正月大水饑 三年詔修廟學

四年夏六月濟寧路大饑人相食 至元三

年詔修尊經閣 四年詔重繪從祀諸賢像五

月河決白茅鄆城濟寧路幾爲巨浸命賈魯治

之 至正二年夏六月大水傷稼人相食 四

年河決曹州濟寧路大水 五年七月河決濟

陰濟寧路大水漂沒官民亭舍殆盡 六年山

東盜起蔓延濟寧路 八年辛亥河決徙濟寧
路於濟州二月以河水爲患於濟寧鄆城置行
都水監以賈魯爲都水 九年正月立山東等
處行水監專治河患 十一年十月置中書行省
於濟寧路十一月孛星見奎又見於婁 十三
年正月太白辰星聚於奎 十六年四月以知
樞密院事實理門分院濟寧路 十七年正月
命山東分省團結義兵 鄆州添設判官一員每
縣添設主簿一員專率義兵以事守禦命各路
達魯花赤提調聽宣慰使節制二月韓林兒黨

毛貴陷山東各路七月鎮守黃門義兵萬戶田
豐叛降於韓林兒陷濟寧路實理門遁義兵萬
戶孟本周攻豐敗走十二月詔諭濟寧路李秉
奕田豐等令出降叙復原職 十八年二月壬
午田豐等復陷濟寧路 十九年九月濟州河
決 二十四年明吳元年大將軍徐達等兵下
山東取濟寧路 二十六年春三月黃河溢泛
濟寧路漂沒田廬百十餘萬 二十七年十二
月戊申明兵收濟寧路守禦濟寧總裁滕嶧曲
泗充鄆曹沛諸郡知江淮等處行樞密院事陳

秉直遁

明

太祖 洪武元年戊申改濟寧路爲府徙治任城

二年己酉立功臣廟徐達居首是年並詔封

天下縣城隍爲監察司民顯佑伯 三年置風

雲竹兩社稷城隍壇 四年縣丞陶友仁因舊

社重建學宮於城北後縣丞呂讓因水患移置

縣治東門 七年河溢鉅野水深四丈餘漂沒

田廬無算是年詔去城隍封號改稱本縣城隍

之神 九年縣丞呂讓重建縣署始遷茲地

十四年詔行賦役黃冊法 十五年頒臥碑於
學宮始建縣學 十八年降濟寧府爲州鉅野
縣仍隨州隸兗州府是年太傅魏國公徐達卒
二十四年河決原武會通河淤

惠帝 建文二年十二月燕兵掠濟州邑人震恐
成祖 永樂九年命工部尙書宋禮等開濬會通
河用濟寧州同知潘叔正之言也

英宗 正統四年重修縣署於治東

不詳其人

六年充

州諸屬蝗 十一年割定陶曹縣屬曹州濟寧
領縣三鉅野與嘉祥鄆城隸分守東兗道

宣宗

宣德二年封靖王嫡第二子泰澄爲鉅野

王

三年知縣趙賢重修學宮

景帝

景泰元年調濟寧左衛於臨清所管河道

以鉅野與嘉祥代之

三年充屬久雨傷稼

五年正月太白歲星合於奎是年八月充屬大

水河漲渰田

七年三月太白熒惑合於奎

英宗

天順二年四月充屬蝗

憲宗

成化三年二月太白犯婁

四年築彭子

山壩障大薛湖

詳山水志

運河是年夏四月鉅野地震

有聲如雷

五年嗣封僖順子陽鑒爲鉅野王

六年大旱 八年旱運河水涸 九年春三

月旱大風紅光燭地有頃晝晦如夜踰二時乃

霽

孝宗 宏治六年四月兗屬地震有聲 十二年

黃河南徙邑被害 十五年九月兗屬地震傾

壞城垣民舍

武帝 正德元年嗣封恭定子當涵爲鉅野王

六年辛未流賊劉六劉七等縱橫山左毒流各

郡州縣十一月攻鄆城邑人戒嚴知縣牛鸞極

力守禦得以保全 七年壬申知縣余守觀以

城址過曠難於防守詳請割西北之半移建東
南

世宗 嘉靖二年旱運河水涸 三年鴻臚寺左

近少卿宋宗重修東南隅古刹觀音寺殿宇即今

大佛寺 凡年十月更定孔廟祀典尊孔子爲

至聖先師 二十二年運河水涸 二十五年

運河水涸 三十二年河溢運道淤大饑人相

食 三十三年有年 三十四年地震 三十

六年丁未懷州白蓮教首楊惠與其徒妖僧會

金煽惑愚民商大常田贊輩至數百人攻掠鉅

野巡撫何鰲調集官兵親臨督剿甫二十九日
平是年嗣封端肅子觀燁爲鉅野王薨謚惠榮
無子以端肅王次子鎮國將軍觀光奉勅管理
府事 三十九年大饑 四十年大水 四十
一年災惑自冒退行抵婁 四十四年七月河
決沛縣逆流至曹縣唐林集下分爲二散漫湖
陂浩渺無際河變至斯爲極

穆宗 皇慶三年邑人重修火神廟 五年大水

十六年運河水淺山東巡撫李戴及勘河給
土中常居敬會題請旨祈禱太山旋得大雨

神宗

萬歷五年六房火

十八年庚寅知縣殷

汝孝纂修邑志

十九年三月西北有星如彗

歷胃室壁入婁

二十一年五月大水

二十

七年八月熒惑犯婁

二十九年秋七月大水

三十五年夏五月雨雹大如鷄子

三十六

年三九疇妻王氏生男如龍色三目一在額上

監生缺唇駢指如繪塑鬼物之形

三十七年

王朝鳳妻一產三男

三十八年熒惑退行婁

次三十九年蝗

四十年蝗

四十三年丙

辰春夏旱蝗大饑民相食骨肉不相保聚流亡

載道是年知縣呂鵬雲倡修邑志未梓奉召北
征 四十四年蝗蝻冰雹 四十六年知縣呂
鵬雲在任瑞麥嘉禾同年並見 四十七年蚩
尤旗見東方 四十八年三月三日大風晝晦
熹宗 天啓元年知縣呂鵬雲捐置學田四頃壹
拾貳畝 二年壬戌地大震城圯過半五月蓮
匪徐鴻儒以妖術煽衆數千攻鉅野焚西南關
民舍知縣趙延慶亟繕壞雉團練鄉勇城池獲
全 三年癸亥知縣方時化刻呂鵬雲所修縣
志告成

莊烈帝 崇禎八年乙亥知縣井濟因流賊之變

修濬城池以資捍禦 十四年至十六年蝗蟲

遍野兼瘟疫盛行饑饉相仍民人父子兄弟夫

婦難顧恩義炊骨而食土寇蜂起路斷行人

十五年壬午冬十有一月我

大清兵連下畿南山東州縣

國朝 互見泰和志

四十八年三月三日大風晝朔

世祖章皇帝順治元年甲申定直省府州縣每歲於正月

十五日十月初一日舉行鄉飲酒禮

命戶部侍郎王鰲永招撫山東檄至士民翕然歸順

總河楊方興平嘉祥滿家硎賊鉅野民得安枕

九年 頒臥碑於學宮是年九月二十一日

聖駕臨雍釋奠

召衍聖公及孔顏曾孟仲五博士及其族人赴京陪祀

觀禮 十一年豁免順治六七兩年山東民欠

地丁本折錢糧 十三年又免八九兩年民欠

是年戶部覆准山東額外荒地每十里設一官

借給資本三年償還後照熟地例起科 十四

年定賦役全書經制條例

聖祖仁皇帝康熙元年壬寅大赦 三年豁免山東順治

十五年以前民欠錢糧次年又將十六七八等
年各項民欠盡行蠲除 七年夏六月十七日
戌時地震邑境民屋坍塌甚多是年總兵楊智
奉

旨帶領官員巡荒鉅野受地四百一十九頃五十餘畝
有零 八年豁免康熙元二三等年實在民欠
十年豁免康熙四五六等年 民欠錢糧 十
八年 頒

聖諭十六條於直省各州縣衛學 二十三年甲子

聖駕東巡黎民擁馬瞻拜

命訶警者弗禁 二十四年

乙丑奉

旨解送原任四川巡撫宋滄兵靖川番籌邊圖手著秉
忠定議並有臺文稿十卷卽

諭發帑建祠致祭

恩賜奉祀生

二十五年普免山東地丁錢糧

十七年頒

御製顏子曾子子思孟子贊立石學宮 二十八年一頒

御製平定準噶爾告成太學碑文 二十九年奉文直省

州縣各置預備倉 三十四年普免山東漕糧

三十六年普免山東應征漕米 四十年縣令

金華縣志 卷之二 三
章宏重修聖廟及兩廡並崇聖名宦鄉賢三祠
兼創建義塾 四十一年及二年淫雨爲災田
禾淹沒又兼疫癘流行死亡逃散不計其數奉
旨派世襲精奇尼哈番夏襄元原任浙江巡撫線一信
戶部貴州清吏司何紳佐領廣格馳駟來鉅會
同知縣章宏賑濟饑民邑慶重生紳民立有萬
民感戴碑是年

聖駕東巡道經鉅野舟中錄朱子句並唐人詩 賜知縣

章宏 四十二年以班匠銀攤入地畝 四十

三年普免山東地丁銀米是年 頒

御製訓飭士子文至儒學 四十四年普免山東地丁銀

四十五年普免山東省歷年民欠銀一百六十九萬一千七百兩有奇糧五千九百石有奇

四十七年戊子知縣章宏續修縣志告成

五十二年普免山東地丁銀是年奉

恩旨人丁以五十二年爲常額續生人丁永不加賦 五

十五年 頒發中和韶樂至儒學 六十一年

縣民史偏妻一產三男

世宗憲皇帝雍正元年癸卯

命改啓聖祠爲崇聖祠追王

先師孔子五代二年

詔建忠義孝弟節孝二祠並劉猛將軍廟 頒

聖諭廣訓至儒學是年升濟寧爲直隸州鉅野爲屬增學

額二名 三年追

封關聖三代公爵

詔以錢糧耗銀歸公定各官養廉春正月庚午日月合

璧 四年以丁賦攤入地畝春三月知縣蔡賜

廩新建忠義孝弟祠是年十二月癸酉黃河澄

清上下一千三百里前後三日爲從來未有之

瑞春二月

詔直省州縣建先農壇行耕藉禮 八年濟寧仍隸兗

州府以鉅野屬曹州直隸州 十年六月庚午

新城保李姓家牛產麒麟 十一年義學圯秋

九月知縣廖開春重新之 十二年知縣廖開

春詳請開濬瀦水河工落成並建修普濟堂於

城東 十三年陞曹州爲府鉅野爲屬是年知

縣廖開春捐置普濟堂義田地二頃三十畝於

獲麟保

高宗純皇帝乾隆元年丙辰大赦大有年 二年有黑風

從西南來晝晦 五年 頒十三經二十一史

至儒學六年 頒上諭及四書文明史至儒

學七年 頒禮器樂器舞器於學宮 八年

頒

世宗憲皇帝上諭二部及樂器至儒學 九年 頒學正

全書至儒學並各廟祭文 十年 普免山東省

錢糧 十一年 頒周易折中性理精義書經

傳說彙纂詩經傳說彙纂春秋傳說彙纂至儒

學 十二年大饑 十三年春饑普免山東地

丁銀三月

聖駕東巡

頒明史綱目三編至儒學

十四年己巳冬

知縣朱容極續修文廟大成殿 十五年奉文

收預備倉爲常平倉是年知縣朱容極續修文

昌祠 十八年冬十月知縣朱容極更義塾爲

麟川書院 二十年 頒

御製平定金川碑文至儒學 二十四年 頒

御製平定伊犁及三禮義疏至儒學 二十五年 頒

大清律例督捕則例至儒學 二十六年 頒鄉會墨

選二部至儒學 三十年

聖駕東巡 三十一年普免山東漕米 三十四年改安

興墓巡檢於荷澤沙土集 三十七年歲考廣

文童額 以前無考 三十八年普免山東地丁銀

四十年乙未秋邑城南十里許吳家集隕星

一入土化為黑石 四十一年

聖駕東巡是年科試廣文童額 四十二年邑人重修節

孝祠 四十三年普免山東省錢糧 四十九

年

聖駕東巡 五十年知縣劉葆萱建奎星樓於城之東南

五十六年知縣劉葆萱請帑修城 六十年

普免山東應徵漕糧是年元旦日食上元月食

知縣陳震詳修普濟堂

仁宗睿皇帝嘉慶元年丙辰大赦歲考廣文童額 二年

科考廣文童額 五年科考廣文童額 十一

年撫憲長 奏請將鉅野汎把總撥歸范縣范

縣營守備移駐鉅野改爲鉅野營 十三年知

縣崔起龍建文昌閣於城之東南 十六年知

縣張荃詳修監獄 十八年癸酉夏旱瘟疫傷

人十之三四米價騰踊民艱於食秋八月邑匪

馬朝棟張見木等勾結各縣教匪聚衆倡亂曹

州鎮總兵劉清帶兵來縣督捕會同知縣王朝

恩招募義勇勦撫兼施從逆張見木馬朝棟趙

登三刑化鵬孫斗南孫大景孫二景靳成閣于
麥及餘匪三十八人同時伏誅脅從解散城邑
獲全 十九年甲戌歲大饑總兵劉清詳請賑
恤民賴以生知縣王朝恩重修麟川書院 二
十年癘疾傷人十之二三 守備夏 詳請添
設營兵一百五名 二十四年普免山東接年
民欠正耗銀米

今上道光元年辛巳大赦科考兩廣文童額是年秋旱時疫

傷人十之三四 二年壬午知縣劉敦孥獲從

逆教首張颯廷伏誅夏大水入城禾稼盡淹詳

請續修普濟堂 三年癸未知縣劉敦拏獲謀

逆餘匪孫自道狄器等讞定發遣給回城大小

伯克爲奴夏大水 四年甲申四月朔五星聚

奎是年秋旱 九年己丑夏四月地震有聲如

雷至夜復震 十二年辛卯大水是年邑人重

修文廟 十三年壬辰署知縣侯紹堂奉憲飭

拏教匪楊本立張欽若等一案 十五年甲午

普免山東省十年以前積欠錢糧閏六月蝗

十七年丙申守備阮熙因弁兵不敷防守詳請

抽撥經制外委一員汛兵二十名駐觀音集秋

七月蝗 十八年戊戌春三月巡撫經 按臨

鉅野校閱營伍夏四月奉憲飭拏教匪邵辰沈

伯嶺案內之于第二韓拏頭等讞定發遣給回

城爲奴六月蝗知縣黃 躬率鄉民撲捕禾稼

獲全 十九年巳亥秋穀穗雙歧有年冬瑞雪

頻降 二十年庚子春麥秀雙歧二月壬戌朔

日食丙子望月食七月初四日舉行賓興筵宴

十八年至二十年知縣黃 續修縣志未峻

卸事至二十六年知縣袁 接修告成並捐修

尊經閣

